

四庫全書

集部

欽定四庫全書

集部

陳文紀卷一

詳校官庶吉士臣瑚圖禮

主事銜臣徐以坤覆勘

總校官進士臣楊懋珩

校對官中書臣朱烜

謄錄監生臣趙廷麒

欽定四庫全書

集部八

陳文紀

總集類

提要

臣等謹案陳文紀八卷明梅鼎祚編南朝六代至陳而終文章亦至陳而極敝其時能自成家者詩惟陰鏗張正見文則徐陵沈炯以外惟江總所傳稍多而或久仕梁朝上承異代或晚歸隋主尚署前銜鼎祚兼其前後諸

作割併於陳以足卷帙揆以所編他集未免
自亂其例然鼎祚既取南北朝文通為編次
苟闕其一代則源流始末有所未詳不得以
泛濫譏也況永明天監相去未遙江左餘風
往往而在韓柳未出以前王楊之麗製燕許
之鴻篇多有取材於是者亦不能以其少而
廢之矣乾隆四十四年七月恭校上

總纂官^臣紀昀^臣陸錫熊^臣孫士毅

總校官臣陸費墀

欽定四庫全書

陳文紀卷一

明梅鼎祚編

武帝

姓陳名霸先字興國吳興長城下若里人仕梁歷高要太守監始興郡討侯景有功位司

空封陳公進爵為王篡梁國號陳都建業在位三年廟曰高祖

遺虞荔書

荔字山披會稽餘姚人入陳歷東揚揚州大中正

荔仕梁為通直散騎常侍兼中書舍人領大著作侯景亂逃歸鄉里張彪之據會稽也荔時在焉及高祖平彪遺荔書文帝方為臨川王又以書與之荔不得已乃應命至都高祖崩文帝嗣位除太子中庶子

喪亂已來賢哲凋散君才用有美聲聞許洛當今朝廷
惟新廣求英雋豈可栖遲東土獨善其身今令兄子將
接出都想必副朝廷虛遲也

禪位告天文

永定元年

皇帝臣諱敢用元牡昭告于皇皇后帝梁氏以圯剝薦
臻歷運有極欽若天運以命于諱夫肇有承民乃樹司
牧選賢與能未常厥性放勛重華之世咸無意於受終
當塗典午之君雖有心於揖讓皆以英才處萬乘高勲

御四海故能大庇黔首光宅區縣有梁末運仍葉邁屯
獯醜憑陵久移神器承聖在外非能祀夏天未悔禍復
罹冠逆嫡嗣廢黜宗枝僭詐天地蕩覆紀綱泯絕諱爰
初投袂大拯橫流重舉義兵實勘多難廢王立帝實有
厥功安國定社用盡其力是謂小康方期大道既而煙
雲表色日月呈瑞緯聚東井龍見譙邦除舊布新既彰
玄象遷虞事夏且協謳譟九域八荒同布衷款百神羣
祀皆有誠願梁帝高謝萬邦授以大寶諱自惟菲薄讓

德不嗣至于再三辭弗獲許僉以百姓須主萬機難曠
皇靈眷命非可謙拒畏天之威用膺嘉祚永言夙志能
無慙德敬簡元辰升壇受禪告類上帝用答民心永保
于我有陳惟明靈是饗

即位大赦詔

五德更運帝王所以御天三正相因夏殷所以宰世雖
色分辭翰時異文質揖讓征伐迄用參差而育德振民
義歸一揆朕以寡昧時屬艱危國步屢屯天維三絕肆

勤先后拯厥橫流藉將帥之功兼猛士之力一匡天下
再造黔黎梁氏以天祿永終厯數攸在遵與能之典集
大命于朕躬顧惟菲德辭不獲亮式從天睠俯協民心
受終文祖升禋上帝繼述百王君臨萬宇若涉川水罔
知攸濟寶業初建皇祚惟新思俾惠澤覃被億兆可大
赦天下改梁太平二年為永定元年賜民爵二級文武
二等鰥寡孤獨不能自存者人穀五斛逋租宿債皆勿
復收其有犯鄉里清議贓汙淫盜者皆洗除先注與之

更始長徒敕繫特皆原之亡官失爵禁錮奪勞一依舊典

奉梁主為江陰王詔

禮陳杞宋詩詠二客弗臣之重歷代斯敦梁氏欽若人祇憲章在昔濟河沉璧高謝萬邦茅賦所加宜遵舊典其以江陰郡奉梁主為江陰王行梁正朔車旗服色一依前準宮館資待務盡優隆

勅州郡璽書

元年

夫四王革代商周所以應天五勝相推軒義所以當運
梁德不造喪亂積年東夏崩騰西都蕩覆蕭勃干紀非
唯趙倫侯景滔天踰于劉載貞陽反篡賊約連兵江左
累屬於鮮卑金陵久非於梁國自有氤氲混沌之世龍
圖鳳紀之前東漢興平之初西朝永嘉之亂天下分崩
未有若於梁朝者也朕以虛薄屬當興運自昔登庸首
清諸越徐門浪泊靡不征行浮海乘山所在勘定冒愬
風塵騁馳師旅六延梁祀十翦疆寇豈曰人謀皆由天

啟梁氏以天祿斯改期運永終欽若唐虞推其鼎玉朕東
西退讓拜手陳辭避舜子於箕山之陽求支伯于滄洲
之野而公卿敦逼率土翹惶天命難稽遂享嘉祚今月
乙亥升禮太壇言念遷桐但有慙德自梁氏將末頻月
亢陽火運斯終秋霖奄降翌日成禮圓丘宿設埃雲晚
霽星象夜張朝景重輪泣三危之膏露晨光合璧帶五
色之卿雲顧惟寡薄彌慙休祉昧旦丕顯方思至治卿
等擁旄方岳相任股肱剖符名字方寄恤隱王厯惟新

念有欣慶想深求民瘼務在廉平愛惠以撫孤貧威刑以禦彊猾若有萑蒲之盜或犯戎商山谷之酋擅彊幽險皆從肆赦咸使知聞如或迷途俾在無貸今遣使人具宣往旨念思善政副此虛懷

刪改科令詔

陳承梁亂刑典疎闊武帝即位思革其弊下詔議制律令三十卷唯

重清議元年十月立
刪律郎刪定律令

朕聞唐虞道盛設畫象而不犯夏商德衰雖孥戮其未備泊乎末代綱目滋繁矧屬亂離憲章遺紊朕始膺寶

歷思廣政樞外可搜舉良才刪改科令羣僚博議務存

平簡

隋書

封長城侯蒨為臨川王詔

東都齊國義乃親賢西漢城陽事兼功烈散騎常侍使
持節都督會稽等十郡諸軍事宣毅將軍會稽太守長
城縣侯蒨學尚清優神寓凝正文參禮樂武定妖氛心
力謀猷為家治國擁旄作守朞月有成辟彼關河功踰
蕭冠崔蒲之盜自反耕農篁竹之豪用稟聲朔朕以虛

寡屬當興運提彼三尺賓于四門王業艱難賴乎此子
宜隆上爵稱是元功可封臨川郡王邑二千戶

永定二年正月乙未詔

夫設官分職因事重輕羽儀車馬隨時隆替晉之五校
鳴笳啟途漢之九卿傳呼竝列虞官夏禮豈曰同科殷
朴周文固無恒格朕膺茲寶歷代是天工留念官方庶
允時衷梁天監中左右驍騎領朱衣直閣竝給儀從北
徐州刺史唱義之初首為此職亂離歲久朝典不存後生

年少希聞舊則今去左右驍騎宜通文武文官則用腹
心武官則用功臣所給儀從同太子二衛率此外衆官
尚書詳為條制

親祠南郊詔

二年

朕受命君臨初移星琯孟陬嘉月備禮泰壇景候昭華
人祗允慶思令億兆咸與惟新且往代祆氛于今猶梗
軍機未息徵賦咸繁事不獲已久知下弊言念黔黎無
忘寢食夫罪無輕重已發覺未發覺在今昧爽以前皆

赦除之西寇自王琳以下竝許反迷一無所問近所募義軍本擬西寇竝宜解遣留家附業輓訂軍資未送者並停元年軍糧逋餘者原其半州郡縣軍戍竝不得輒遣使民間務存優養若有侵擾嚴為法制

宥沈泰部曲妻兒詔

二年

罰不及嗣自古通典罪疑惟輕布在方策沈泰反覆無行遐邇所知昔有微功仍荷朝寄剖符名郡推轂累藩漢口班師還居方岳良田有踰於四百食客不止于三

千富貴顯榮政當如此鬼害其盈天奪之鬼無故猖狂
自投獯醜雖復知人則哲惟帝其難光武有蔽于龐萌
魏武不知於于禁但令朝廷無我負人其部曲妻兒各
令復業所在軍人若有恐脅侵掠者皆以刼論若有男
女口為人所藏竝許詣臺申訴若樂隨臨川王及節將
立效者悉皆聽許

下選曹詔

二年

梁時舊仕亂離播越始還朝廷多未銓序又起兵以來

軍勲甚衆選曹即條文武簿及節將應九流者量其所擬

隆禮諸公主詔

三年

南康始興王諸妹已有封爵依禮止是藩主此二王者有殊恒情宜隆禮數諸主儀秩及尚主可竝同皇女

賑恤吳州緡州詔

開廩賑絕育民之大惠巡方恤患前王之令典朕當斯季俗膺此樂推君德未孚民瘼猶甚重茲多壘彌疫納

隍良由四聰弗達千里勿應博施之仁何其或喪殘弊
之軌致此未康吳州縉州去歲蝗旱郢田雖疏鄭渠終
涸室靡盈積之望家有填壑之嗟百姓不足兆民何賴
近已遣中書舍人江德藻銜命東陽與令長二千石問
民疾苦仍以入臺倉見米分恤雖德非既飽庶微慰阻
饑

日食服袞冕詔

有司奏舊儀御前殿服
朱紗袍通天冠詔曰

此乃前代承用意有未同合朔仰助太陽宜備袞冕之

服自今以去永可為準

討熊曇朗詔

曇朗為北江州刺史殺都督周文育舉兵反

曇朗噬逆罪不容誅分命衆軍仍事掩討方加梟磔以明刑憲

踐阼封諸子侯詔

維城宗子實固有周盤石懿親用隆大漢故會盟則異姓為後啟土則非劉勿王所以糾合枝幹廣樹蕃屏前王懋典列代恒規從子持節員外散騎常侍明威將軍

雍州刺史監南徐州擬持節通直散騎常侍貞威將軍北徐州刺史褒從子晃晃從孫假節員外散騎常侍明威將軍諄假節信威將軍北徐州刺史古陽縣開國侯諄假節通直散騎侍郎信武將軍祐假節散騎侍郎雄信將軍青州刺史廣梁太守詳貞威將軍通直散騎侍郎慧紀從孫敬雅敬泰竝枝戚密近勦勞王室宜列河山以光建擬可永修縣開國侯褒鍾陵縣開國侯晃建城縣開國侯晃上饒縣開國侯諄虔化縣開國侯

諠仍前封祐豫章縣開國侯詳遂興縣開國侯慧紀宜
黃縣開國侯敬雅寧都縣開國侯敬泰平固縣開國侯
各邑五百戶

贈周鐵虎詔

鐵虎隨周文育西征王琳敗績為琳所獲辭氣不屈見害高祖下詔

天地之寶所貴曰生形鬼之徒所重唯命至如捐生立
節効命酬恩追遠懷昔信宜加等散騎常侍嚴威將軍
太子左衛率潼州刺史領信義太守沌陽縣開國侯鐵
虎器局沈厚風力勇壯北討南征竭忠盡力推鋒江夏

致陷山徒神氣彌雄肆言無撓豈直溫序見害方其理
鬚龐德臨危猶能瞋目忠貞如此惻愴兼深可贈中護
軍將軍青冀二州刺史加封一千戶并給鼓吹一部侯
如故

文帝

名蒨字子華武帝兄始興昭烈王長子封臨
川王拜侍中武帝崩遺詔徵立在此七年廟

曰世
祖

與虞荔書

君東南有美聲譽洽聞自應翰飛京許共康時弊而削

迹丘園保茲獨善豈使稱空谷之望邪必願便爾俶裝
且為出都之計惟遲披覲在於茲日

荆迹尺牘
作刻跡誤

勅虞荔

初荔母隨荔入臺卒於臺內尋而城陷情禮
不申由是終身蔬食布衣不聽音樂時第二
弟寄寓閩中依陳寶應荔每言之輒流涕因
以感疾帝以荔蔬食積久非羸疾所宜乃勅
荔終
不從

能敦布素乃當為高卿年事已多氣力稍減方欲仗委
良須克壯今給卿炙肉不得固從所執也

即位詔

上天降禍奄集邦家大行皇帝背離萬國率土崩心若喪考妣龍圖寶歷眇屬朕躬運鍾擾攘事切機務南面須主西讓禮輕今便式膺景命光宅四海可大赦天下罪無輕重悉皆蕩滌逋租宿債吏民憊負可勿復收文武内外量加爵叙孝悌力田為父後者賜爵一級庶祇畏在心公卿畢力勝殘去殺無待百年興言號哽深增慟絕

天嘉元年春正月大赦詔

朕以寡昧嗣纂洪業哀惻在疚治道弗昭仰惟前德幽顯遐暢恭已不言庶幾無改雖宏圖懋軌日月方弘而清廟廓然聖靈浸遠感尋永往瞻言罔極今四象運周三元告獻華夷胥洎玉帛駿奔思覃遺澤播之億兆其大赦天下改永定四年為天嘉元年鰥寡孤獨不能自存立者賜穀人五斛孝悌力田殊行異等加爵一級

親祠南郊詔

元年

朕式饗上玄虔奉牲玉高禋禮畢誠敬兼弘且陰霾決
辰褰霽在日雲物韶朗風景清和慶動人祇忭流庶俗
思俾黎元同此多祜可賜民爵一級

平王琳原宥詔

元年

夫五運遞來三靈眷命皇王因之改創殷周所以樂推
朕統歷承基丕隆鼎運期理攸屬數祚在斯豈僥倖所
至寧卜祝可求故知神器之重必在符命是以逐鹿貽
譏斷蛇定業亂臣賊子異世同尤王琳識暗挈手瓶智慙

衛足干紀亂常自貽顛沛而縉紳君子多被繫維雖涇渭合流蘭鮑同肆求之厥理或有脅從今九罟既設八紘斯掩天網恢恢吞舟是漏至如伏波遊說永作漢蕃延壽脫歸終為魏守器改秦虞材通晉楚行藏用舍亦豈有恒宜嘉寬仁以彰雷作其衣冠士族預在凶黨悉皆原宥將帥戰兵亦同肆青並隨材銓引庶收力用

蠲復詔

元年

日者凶渠肆虐衆軍進討舟艦輸積權倩民丁師出經

時役勞日久今氛祲廓清宜有甄被可蠲復丁身夫妻三年於役不幸者復其妻子

寬賦詔

元年

自喪亂以來十有餘載編戶凋亡萬不遺一中原民庶蓋云無幾頃者寇難仍接筭歛繁多且興師以來千金日費府藏虛竭杼軸歲空近所置軍資本克戎備今元惡克殄八表已康兵戈靜戢息肩方在思俾餘黎陶此寬賦今歲軍糧通減三分之一尚書申下四方稱朕哀

矜之意守宰明加勸課務急農桑庶鼓腹含哺復在茲
日

錄序蕭莊官屬詔

元年

蕭莊偽署文武官屬還朝者量加錄序

迎葬梁元帝詔

元年

梁孝元遭離多難靈櫬播越朕昔經北面有異常倫遣
使迎接以次近路江寧既有舊塋宜即安卜車旗禮章
悉用梁典依魏葬漢獻帝故事

進舉賢良詔

元年

朕以眇身屬當大寶負荷至重憂責實深而庶績未康
胥怨猶結佇咨賢良發於夢想每有一言入聽片善可
求何嘗不褒獎抽揚緘書紳帶而傳巖虛往穹谷尚淹
蒲幣空陳旌弓不至豈當有乖則哲使草澤遺才將時
運澆流今不逮古側食長懷寢興增嘆新安太守陸山
才有啟薦梁前征西從事中郎蕭策梁前尚書中兵郎
王暹竝世胄清華羽儀著族或文史足用或孝德可稱

並宜登之朝序擢以不次王公以下其各進舉賢良申
薦淪屈庶衆才必萃大厦可成使棧樸載歌由庚在詠

令流移著籍詔

元年

自頃喪亂編戶播遷言念餘黎良可哀愴其亡鄉失土
逐食流移者今年內隨其適樂來歲不問僑舊悉令著
籍同土斷之例

令種麥詔

元年

穀粟之貴重於珠玉自頃寇戎游手者衆民失分地之

金史卷一百一十五
卷一
業士有佩犢之譏朕哀矜黔庶念康弊俗思俾阻饑方
存富教麥之為用要切斯甚今九秋在節萬寶可收其
班宣遠近竝令播種守宰親臨勸課務使及時其有尤
貧量給種子

崇儉詔

元年

汙罇土鼓誠則難追畫卵彫薪或可易革梁氏末運奢
麗已甚芻豢厭於胥史歌鍾列於管庫牛木被朱丹之
采車馬飾金玉之珍遂欲澆流遷訛遂遠朕自諸生頗

為內足而家敦朴素室靡浮華觀覽時俗常所扼腕今
妄假時乘臨馭區極屬當淪季思聞治道菲食卑宮自
安儉陋俾茲薄俗獲反淳風維雕鏤淫飾非兵器及國
容所須金銀珠玉衣服雜玩悉皆禁斷

春夏停刑詔

元年

古者春夏二氣不決重罪蓋以陽和布澤天秩是弘寬
網省刑義符含育前王所以則天象地立法垂訓者也
朕屬當澆季思求民瘼哀矜惻隱念甚納隍常欲式遵

舊軌用長風化自今孟春訖于夏首罪人太辟事已款
者宜且申停

勲臣配食高祖廟庭詔

二年

姬業方闡望載渭濱漢歷既融道通圯上若乃儲精辰
宿降靈惟岳風雲有感夢寐是求斯固舟楫鹽梅遞相
表裏長世建國罔或不然至于銘德太常從祀清廟以
貽厥後來垂諸不朽者也前皇經濟區宇裁成品物靈
貺式甄光膺寶命雖謦明濬發幽顯協從亦文武賢能

翼宣王業故大司馬驃騎大將軍瑱故司空文育故平
北將軍開府儀同三司僧明故中護軍頴故領軍將軍
擬或締構艱難經綸夷險或摧鋒冒刃殉義遺生或宣
哲協規綢繆帷幄或披荆汗馬終始勤劬莫不罄誠悉
力屯泰以之朕以寡昧嗣膺丕緒永言勲烈思弘典訓
便可式遵故實載揚盛軌可竝配食高祖廟庭俾茲大
猷永傳宗祏

親祠南郊詔

三年春
正月

朕負荷寶圖亟回星琯兢兢業業庶幾治定而德化不
孚俗弊滋甚永言念之無忘日夜陽和布氣昭事上玄
躬奉牲玉誠兼鄉食敬思與黎元被斯寬惠可普賜民爵
一級其孝悌力田別加一等

曲赦京師詔

五年

朕以寡昧屬當負重星籥亟改冕旒弗曠不能仰協璿
衡用調玉燭傍慰蒼生以安黔首兵無寧歲民乏有年
移風之道未弘習俗之患猶在致令民多觸網吏繁筆

削獄犴滋章雖由物犯囹圄淹滯亦或有寃念俾納隍
載勞負戾加以膚湊不適攝衛有虧比獲微痊思覃寬
惠可曲赦京師

修治前代王侯忠烈墳冢詔

六年

梁室多故禍亂相尋兵甲紛紜十年不解不逞之徒虐
流生氣無賴之屬暴及徂魂江左肇基王者攸宅金行
水位之圭木運火德之君時更四代歲逾二百若其經
綸三業縉紳民望忠臣孝子何世無才而零落山丘變

移陵谷或皆剪伐莫不侵殘玉杯得於民間漆簡傳於
世載無復五株之樹罕見千年之表自大祚光啟恭惟
揖讓爰暨朕躬聿修祖武雖復旂旗服色猶行杞宋之
計每車駕巡遊眇瞻河雒之路故喬山之祀蘋藻弗虧
驪山之墳松栢恒守唯戚藩舊龍士子故塋掩殫未周
樵牧猶衆或親屬流隸負土無期子孫寔滅手植何寄
漢高留連於無忌宋祖惆悵於子房丘墓生哀生靈共
惻者也朕所以興言永日思慰幽泉維前代王侯自古

忠烈墳冢被發絕無後者可檢行修治墓中樹木勿得
樵採庶幽顯咸暢稱朕意焉

曲赦京師詔

六年

朕自居民牧之重託在王公之上顧其寡昧鬱於治道
加以屢虧聽覽事多壅積寃滯靡申幽枉弗鑒念茲罪
戾有甚納隍而惠澤未流愆陽累月今歲序云暮元正
向肇欲使幽圉之內同被時和可曲赦京師

改元天康大赦詔

朕以寡德纂承洪緒日昃劬勞思弘景業而政道多昧
黎庶未康兼疹患淹時亢陽累月百姓何咎實由朕躬
念茲在茲痛如疾首可大赦天下改天嘉七年為天康
元年

遺詔

天康
元年

朕疾苦彌留遂至不救修短有命夫復何言但王業艱
難頻歲軍旅生民多弊無忘愧惕今方隅乃定俗教未
弘便及大漸以為遺恨社稷任重太子可即君臨王侯

將相善相輔翼內外協和勿違朕意山陵務存儉速大
斂竟羣臣三日一臨公除之制率依舊典

誅戾安都詔

安都從高祖征伐有功高祖崩翼奉世祖入繼大統及衡陽王昌將

入濟漢而薨安都之謀也封清遠郡公自是威名日重驕恣無禮舍人蔡景愿奏其謀反

世祖收安都下詔于嘉德殿西省賜死

昔漢厚功臣韓彭肇亂晉倚蕃牧敦約稱兵託六尺於
寵萌野心竊發寄股肱於霍禹凶謀潛構追惟往代挺
逆一揆永言自古患難同規戾安都素乏遙圖本慙令

德幸屬興運預奉經綸拔跡行間假之毛羽推於偏帥
委以馳逐位極三槐任居四嶽名器隆赫禮數莫儔而
志唯矜已氣在陵上招聚逋逃窮極輕狡無賴無行不
畏不恭受服專征剽掠一逞推轂所鎮哀歛無厭寄以
徐蕃接鄰齊境貿遷禁貨鬻賣居民推埋發掘毒流
泉壤睚眦僵尸罔顧彝憲朕以爰初締構頗著功績飛
驂代邸預定嘉謀所以淹抑有司每懷遵養杜絕百辟
日望自新款襟期於話言推丹赤於造次策馬甲第羽

林息警置酒高堂陞戟無衛何嘗內隱片嫌去栢人而
勿宿外協猜防入成臯而不留而勃戾不悛驕暴滋甚
招誘文武密懷異圖去年十二月十一日獲中書舍人
蔡景歷啟稱戾安都去月十日遣別駕周宏實來景歷
私省宿訪問禁中具陳反計朕猶隱忍待之如初爰自
北門遷授南服受命經停姦謀益露今者欲因初鎮將
行不軌此而可忍孰不可容賴社稷之靈近侍誠慙醜
情彰暴逆節顯聞外可詳案舊典速正刑書止在同謀

餘無所問

周鐵虎配食高祖廟庭詔

漢室功臣形寫宮觀魏朝猛將名配宗祧功烈所以長
存世代因之不朽故侍中護軍將軍青冀二州刺史沌
陽縣開國侯鐵虎誠節鯁亮力用雄敢王業初基行間
累及垂翅賊壘正色冠庭古之遺烈有識同壯隕身不
屈雖隆榮等營魂易遠言追嘉惜宜仰陪壩寢恭頒饗
奠可配食高祖廟庭

賻卹周敷詔

敷高祖時以平王琳功授豫章太守天嘉初攻周迪破之後為迪所

誘害文

帝下詔

使持節散騎常侍都督南豫州緣江諸軍事鎮南將軍南豫州刺史西豐縣開國侯敷受任遐征淹時違律虛衿姦詭遂貽喪身但夙著勤誠亟勞戎旅猶深惻愴愍悼于懷可存其茅賦量所賻卹還葬京邑

討留異詔

異東陽著姓侯景亂署東陽太守尋仕梁元帝信安令入陳歷授縉州刺史

史領東陽異雖外示臣節恒懷兩端與王琳潛通琳平世祖乃下詔討之異奔陳寶應寶

應敗并擒異送
都斬于建康市

昔四罪難弘大媯之所無赦九黎亂德少昊之所必誅
自古皇王不貪征伐苟為時蠹事非獲已逆賊留異數
應亡滅繕甲完聚由來積年進謝羣龍自躍于千里退懷
首鼠恒持於百心中歲密契番禺既弘天網賜以名爵
敦以國姻儻望懷音猶能革面王琳竊據中流翻相應
接別引南川之嶺路專為東道之主人結附凶渠唯欣
禍亂既祆氛盪定氣沮心孤類傷鳥之驚弦等窮獸之

謀觸雖復遣家入質子陽之態轉適侍子還朝隗囂之
心方熾朕志相成養不計疵隱披襟解帶敦喻殷勤蜂
目彌彰梟聲無改遂置軍江口嚴戍下淮顯然反叛非
可容匿且縉邦膏腴稽南殷曠永割王賦長壅國民竹
箭良材絕望京輦萑蒲小盜共肆貪殘念彼餘甿兼其
慨息西戎屈膝自歎重關秦國依風竝輸侵地三邊已
又四海咸寧唯此微妖所宜清殄可遣使持節都督南
徐州諸軍事征北將軍司空南徐州刺史桂陽郡開國

公安都指往擒戮罪止異身餘無所問

尚書下討周迪符

迪臨川著姓侯景亂據有其地領臨川內史平蕭勃遷江

州刺史陳世祖初與周敷黃法輿共屠熊曇朗敷等詣闕加賞世祖徵迪及其子趙超不至乃陰與留異相結天嘉三年尚書下符討迪迪衆潰竄臨川太守駱牙誘斬之

告臨川郡士庶昔西京為盛信越背誕東都中興萌寵
違戾是以鷹鷂競逐菹醢極誅自古有之其來尚矣逆
賊周迪本出輿臺有梁喪亂暴掠山谷我高祖躬率百
越師次九川濯其泥沙假以毛羽裁解豚佩仍剖虎符

卯翼之恩方斯莫喻皇運肇基頗有誠款國步艱阻竟
微効力龍節繡衣籍王爵而御下熊旗組甲因地險而
陵上日者王琳始貳蕭勃未夷西結三湘南通五嶺衡
廣勘定既安反側江郢紛梗復生携背擁據一郡苟且
百心志貌常違言迹不副特以新吳未靜地遠兵彊互
相兼并成其形勢收獲器械俘虜士民竝曰私財曾無
獻捷時遣一介終持兩端朝廷光大含弘引納崇遇遂
乃位等三槐任均四嶽富貴隆赫超絕功臣加以出師

逾嶺遠相響援按甲斷江翻然猜拒故司空愍公敦以
宗盟情同骨肉城池連接勢猶脣齒彭亡之禍坐觀難
作階此豐故結其黨羽于時北寇侵軼西賊憑陵靡履
糗糧悉以資寇爵號軍容一遵偽黨及王師凱振大定
區中天網恢弘棄之度外璽書綸結撫慰綢繆冠蓋縉
紳敦授重疊至於熊曇朗勦滅豐城克定蓋由儀同法
軼之元功安西周敷之効力司勳有典懋賞斯舊惡直
醜正自為仇讎悖禮姦謀因此滋甚徵出湓城歷年不就

求遣侍子累載未朝外誘逋亡招集不逞中調京輦規
冀非常擅斂征賦罕歸九府擁遏二賈害及四民潛結
賊異共為表裏同惡相求密加應援謂我六軍薄伐三
越未寧屠破述城虜縛妻息分襲湓鎮稱兵蠡邦拘逼
酋豪攻圍城邑幸國有備應時勦殄假節通直散騎常
侍仁武將軍尋陽太守懷仁縣伯華皎明威將軍廬陵
太守益陽縣子陸子隆竝破賊徒剋全郡境持節散騎
常侍安西將軍定州刺史領豫章太守西豐縣侯周敷

躬扞溝壘身當矢石率茲義勇以寡摧衆斬馘萬計俘虜千羣廸方收餘燼還固墉堞使持節安南將軍開府儀同三司高州刺史新建縣侯法氈雄績早宣忠誠夙著未奉王命前率義旅既援敷等又金子隆裹糧擐甲仍躡飛走批熊之旅驅馳越電振武之衆叱咤移山以此追奔理無遺類雖復朽株將拔非待尋斧落葉就殞無勞烈風但去草絕根在於未蔓撲火止燎貴乎速滅分命將帥實資英果今遣鎮南儀同司馬湘東公相劉廣

德兼平西司馬孫曉北新蔡太守魯廣達持節安南將軍吳州刺史彭澤縣侯魯悉達甲士萬人步出興口又遣前吳興太守胡櫟樹功將軍前宣城太守錢法成天門義陽二郡太守樊毅雲麾將軍合州刺史南固縣侯焦僧度嚴武將軍建州刺史辰縣子張智達持節都督江吳二州諸軍事安南將軍江州刺史安吳縣侯吳明徹樓艦馬步直指臨川前安成內史劉士京巴山太守蔡僧貴南康內史劉峯廬陵太守陸子隆安城內史闕

慎並受儀同法貲節度同會故郡又命尋陽太守華皎
先烈將軍巴州刺史潘純陁平西將軍郢州刺史欣樂
縣侯章昭達竝率貔貅逕造賊城使持節散騎常侍鎮
南將軍開府儀同三司湘州刺史湘東郡公度分遣偏
裨相繼上道戈船蔽水穀騎彌山又詔鎮南將軍開府
儀同三司歐陽頔率其子弟交州刺史盛新除太子右
率邃衡州刺史侯曉等以勁越之兵踰嶺北邁千里同
期百道俱集如脫稽誅更淹旬晦司空大都督安都已

平賊異凱歸非久飲至禮畢乘勝長驅勦撲凶醜如燎毛髮已有明詔罪唯廸身黎民何辜一皆原宥其有因機立功賞如別格執迷不改刑茲罔赦

尚書下討陳寶應符

寶應晉安著姓梁末襲父為晉安太守入陳授閩州

刺史世祖錄其本系編為宗室寶應本留異婿異謀逆遣兵助之又資周廸兵出冠臨川都督章昭達破廸世祖因命討寶應尚書下符寶應敗就執送都伏誅

告晉安士庶昔隴西旅拒漢不稽誅遼東叛渙魏申宏略若夫無諸漢之策勲有扈夏之同姓至於納吳淠之

子致橫海之師違姒啟之命有甘誓之討況廼族不繫
於宗盟名無紀于庸器而顯成三叛豐深四罪者乎案
閩寇陳寶應父子卉服支孽本迷愛敬梁季喪亂閩隅
阻絕父既豪俠扇動蠻陬椎髻箕坐自為渠帥無聞訓
義所資姦諂爰肆蜂豺俄而解印炎行方謝網漏吞舟
日月居諸弃之度外自東南王氣實表聖基斗牛聚星
允符王迹梯山航海雖若欵誠擅割瓌珍竟微職貢朝
廷遵養含弘寵靈隆赫起家臨郡兼畫繡之榮裂地置

州假藩麾之盛即封戶牖仍邑櫟陽乘華轂者十人保
弊廬而萬石又以盛漢君臨推恩婁敬隆周朝會廼長
滕侯由是紫泥青紙遠賁恩澤鄉亭龜組頒及嬰孩自
谷遷喬孰復為擬而苞藏鳩毒敢行狼戾連結留異表
裏周迪盟軟婚姻自為脣齒屈彊山谷推移歲時及我
穀騎防山定秦望之西部戈船下瀨克匯澤之南川遂
敢舉斧並助凶孽莫不應弦摧衄盡殪醜徒每以罪在
首渠憫茲驅逼所收俘馘並勒矜放仍遣中使爰降詔

書天網恢弘猶許改思異既走險廸又逃刑誑侮王人
為之川藪遂使袁熙請席遠歎頭行馬援觀蛙猶安井
底至如遇絕九賦剽掠四民闔境資財盡室封奪凡厥
倉頭皆略黔首蝥賊相扇叶契連蹤乃復踰趨瀛溟寇
擾浹口侵軼嶺嶠掩襲述城縛掠吏民焚燒官寺此而
可縱孰不可容今遣沙州刺史俞丈問明威將軍程文
季假節宣猛將軍成州刺史甘他假節雲旗將軍譚瑱
假節宣猛將軍前監臨海郡陳思慶前軍將軍徐智遠

明毅將軍宜黃縣開國侯慧紀開遠軍將軍新除晉安
太守趙彖持節通直散騎常侍壯武將軍定州刺史康
樂縣開國侯林馮假節信威將軍都督東討諸軍事益
州刺史余孝頃率羽林二萬蒙衝益海乘跨滄波掃蕩
巢窟此皆明耻教戰濡須鞠旅累從楊僕亟走孫恩斬
蛟中流命馮夷而鳴鼓鼉鼉為駕轡方壺而建旗義安
太守張紹賓忠誠款到累使求軍南康內史裴忌新除
輕車將軍劉峰東衡州刺史錢道戢並即遣人仗與紹

賓同行故司空歐陽公昔有表奏請宣薄伐遙途意合
若伏波之論兵長逝遺誠同子顏之勿赦征南薨謝上
策無忘周南餘恨嗣子弗忝廣州刺史歐陽紇克符家
聲聿遵廣略舟師步卒二萬分趨水扼長鯨陸掣封豨
董率衡廣之師會我六軍潼州刺史李睹明州刺史戴
晃新州刺史區白獸壯武將軍修行師陳留太守張遂
前安成內史闕慎前廬陵太守陸子隆前豫章太守任
蠻奴巴山太守黃法慈戎昭將軍湘東公世子徐敬成

吳州刺史魯廣達前吳州刺史遂興縣開國侯詳使持
節都督征討諸軍事散騎常侍護軍將軍昭達率緹
騎五千組甲二萬直渡邵武仍頓晉安按轡揚旌夷山
堙谷指期掎角以制飛走前宣城太守錢肅臨川太守
駱牙太子左衛率孫詡尋陽太守莫景隆豫章太守劉
廣德並隨機鎮遏絡驛在路使持節散騎常侍鎮南將軍
開府儀同三司江州刺史新建縣開國侯法氈戒嚴中
流以為後殿斧鉞所臨罪唯元惡及留異父子其黨主

帥雖有請泥函谷相背淮陰若能翻然改圖因機立效
非止肆青仍加賞擢其建晉士民久被驅迫者大軍明
加撫慰各安樂業流寓失鄉即還本土其餘立功立事
已具賞格若執迷不改同惡趙趙斧鉞一臨罔知所赦

衡陽王昌卹典詔

昌為高祖第六子梁時侯景
平拜長城國世子荊州陷遷

于西魏及高祖崩周人乃遣還世祖即位使
侯安都迎昌害之以溺漢江薨下詔褒卹

夫寵章所以嘉德禮數所以崇親乃歷代之通規固前
王之令典新除使持節散騎常侍都督湘州諸軍事驃

騎將軍湘州牧衡陽王昌明哲在躬珪璋早秀孝敬內
湛聰睿外宣梁季艱虞宗社顛墜西京淪覆陷身關隴
及鼎業初基外蕃逆命聘問斯阻音介莫通睽彼機橋
將隣烏白今者羣公戮力多難廓清輕傳入郭無勞假
道周朝敦其繼好驂駕歸來欣此朝聞庶歡昏定報施
徒語曾莫輔仁人之云亡殄悴斯在奄焉薨殞倍增傷
悼津門之慟空在桓岫之切不追靜言念之心焉如割
宜隆懋典以協徽猷可贈侍中假黃鉞都督中外諸軍

事太宰揚州牧給東園溫明祕器九旒鑾輅黃屋左纛
武賁班劍百人輜輶車前後部羽葆鼓吹葬送之儀一
依漢東平憲王齊豫章文獻王故事仍遣大司空持節
迎護喪事大鴻臚副其羽衛殯送所須隨由備辦

南康王曇朗子方泰為世子詔

曇朗高祖母弟
休先子梁紹泰

初為中書侍郎監南徐州時齊請和求高祖
子姪為質以曇朗行及齊背約高祖與戰大
破之誅其將蕭軌等齊人亦害曇朗世祖天
嘉元年以曇朗子方泰為南康王世子二年
齊人結好方始知之於是
襲爵乃下詔追贈曇朗

南康王曇朗出隔齊庭反身莫測國廟方修奠饗須主
可以長男方泰為南康世子嗣南康王

封第二子伯茂為始興王詔

高祖兄始興王道談生世祖及高宗

梁末高宗遷關右高祖受禪遙以高宗襲封
始興嗣王及世祖入繼時高宗在周世祖以
本宗乏饗食下詔
以伯茂嗣封

日者王基肇建封樹枝戚朕親地攸在特啟大邦弟項
嗣承門祀雖土宇開建薦饗莫由重以遭家不造閔凶
夙邁儲貳遐隔轄車未返猥以眇身膺茲景命式循龜

鼎冰谷載懷今既入奉太宗事絕藩裸始興國廟蒸嘗
無主瞻言霜露感尋慟絕其徙封嗣王頊為安成王封
第二子伯茂為始興王以奉昭烈王祀賜天下為父後
者爵一級庶申罔極之情永保山河之祚

尚書八座奏崇始興王伯茂

舊制諸王受封未
加戎號者不置佐

史於是八座
尚書奏詔可

夫增崇徽號飾表車服所以闡彰厥德下變民望第二
皇子新除始興王伯茂體自尊極神姿明頴玉暎鴈辰

蘭芬綺歲清輝美譽日茂月升道鬱平河聲超袞植皇
情追感聖性天深以本宗闕緒纂承藩嗣雖珪社是膺
而戎章未襲豈所以光崇睿哲寵樹皇枝臣等參議宜
加寧遠將軍置佐史

封鄱陽王伯山策

世祖第三子

於戲夫建樹藩屏翼獎王室欽若前典咸必由之惟爾
夙挺珪璋生知孝敬令德茂親僉譽所集啟建大邦實
惟倫序是用敬遵民瞻錫此圭瑞往欽哉其勉樹聲業

永保宗社可不慎歟

尚書八座奏封鄱陽郡王伯山

臣聞本枝惟允宗周之業以弘盤石既建皇漢之基斯
遠故能協宣五運規範百王式固靈根克隆卜世第三
皇子伯山發睿德於齠年表岐姿於朏日光昭丹掖暉
映青闈而玉圭未秉金錫靡駕豈所以敦序維翰建樹
藩戚臣等參議封鄱陽郡王

廢帝

諱伯宗字奉業世祖嫡
長子立二年宣帝廢之

即位詔

上天降禍大行皇帝奄弃萬國攀號靡及五內崩殞朕
以寡德嗣膺寶命兢兢在疚懼甚綴旒方賴宰輔匡其
不逮可大赦天下

改元光大大赦詔

昔昊天成命降集寶圖二后重光九區咸乂閔余沖薄
王道未昭荷茲神器如涉靈海底親賢竝建牧伯惟良
天下雍熙緬同刑措今三元改厯萬國克庭清廟無追

具僚斯在言瞻寧位觸感崩心思播遺恩俾覃黎獻可
大赦天下改天康二年為光大元年孝悌力田賜爵一
級

到仲舉韓子高付廷尉詔

仲舉為侍中尚書僕射文帝崩宣帝受遺

詔以尚書令入輔仲舉等慮朝望有歸乃矯
旨遣還東府事發同謀並誅仲舉廢居私宅
不自安每乘小輿與右衛將軍韓子高謀宣
帝收子高仲舉及其子郁並付廷尉賜死

到仲舉庸力小才坐叨顯貴受任前朝榮寵隆赫父參
王政子據大邦禮盛外姻勢均戚里而肆其驕閭凌傲

百司過密之初擅行國政排黜懿親欺蔑台衮韓子高
輩爾細微擢自卑末入參禁衛委以心腹蜂蠆有毒敢
行反噬仲舉子高共為表裏陰構姦謀密為異計安成
王朕之叔父親莫重焉受命導揚稟承顧託以朕沖弱
屬當保佑家國安危事歸宰輔伊周之重物無異議將
相舊臣咸知宗仰而率聚凶徒欲相掩襲屯據東城進
逼宗禮規樹仲舉以執國權陵斥司徒意在專政潛結
黨附方危社稷賴祖宗之靈姦謀顯露前上虞令陸昉

等具告其事並有據驗并尅今月七日縱其凶惡領
軍將軍明徹左衛將軍衛尉卿寶安及諸公等又竝知
其事二三豐迹彰於朝野反道背德事駭聞見今大慈
克殲罪人斯得竝可收付廷尉肅正刑書罪止仲舉父
子及高三人而已其餘一從曠蕩竝所不問

誅華皎家口詔

皎世本小吏以功歷湘州刺史有異志勾引周兵又奉梁蕭歸

為主歸授皎司空光大初宣帝輔政遣吳明
徹為湘州而以淳于量程靈洗等共討之復


恐上流宰守竝為皎扇
惑下詔曲赦皎敗誅

逆賊華皎極惡窮凶遂樹立蕭歸謀危社稷棄親即讎
人神憤惋王師電速水陸爭前梟剪之期匪朝伊暮其
家口在北里尚方宜從誅戮用明國憲

曲赦湘巴二州詔

賊皎輿卑微賤特逢獎擢任據藩牧屬當寵寄背斯造
育興構姦謀樹立蕭氏盟約彰露鴆毒存心志危宗
社扇結邊境驅逼士庶蟻聚巴湘豕突駢郢逆天反地
人神忿嫉征南將軍量安南將軍明徹郢州刺史靈洗

受律專征備盡心力撫勞驍雄舟師俱進義烈爭奮
惡奔殄獻捷相望重氛載廓言念泣罪思與惟新可曲
赦湘巴二州凡厥為賊所逼制預在宥黨惡皆不問其
賊主帥節相竝許開恩出首一同曠蕩



陳文紀卷一

欽定四庫全書

集部

陳文紀卷二

詳校官庶吉士臣瑚圖禮

主事銜臣徐以坤覆勘

總校官進士臣楊懋珩

校對官中書臣朱炘

謄錄監生臣趙廷麒

欽定四庫全書

陳文紀卷二

明 梅鼎祚 編

宣帝

名頊字紹世文帝弟徙封安成王廢文帝子伯宗自立在位十四年廟曰高宗

即位詔

太建元年

夫聖人受命王者中興並由懿德方作元后高祖武皇帝揖拜堯圖經綸禹跡配天之業光辰象而利貞格地之功侔川岳而長遠世祖文皇帝體上聖之姿當下武之運築宮示儉所務唯德定鼎初基厥謀斯在朕以寡

薄才非聖賢夙荷前規方傳景祚雖復親承訓誨志守
藩維詠季子之高風思城陽之遠託自元儲紹國正位
君臨無道非幾佇聞刑措豈圖王室不造頻謀亂階天
步艱難將傾寶厯仰惟嘉命爰集朕躬我心貞確堅誓
蒼昊而羣辟啟請相諠渭橋文母尊嚴懸心長樂對揚
璽紱非止殷湯之三辭履涉春冬何但代王之五讓今
便肅奉天策欽承介主若據滄溟踰增兢業思所以雲
行雨施品物咸亨當與黔黎普同斯慶可改光太三年

為太建元年大赦天下在位文武賜位一階孝悌力田
及為父後者賜爵一級異等殊才竝加策序鰥寡孤獨
不能自存者人賜穀五斛

太建二年秋蠲卹詔

懷遠以德抑惟恒典望恩倖澤民之常情頃年江介襁
負相隨崎嶇歸化亭候不絕宜加卹養答其誠心維是
荒境自投有在都邑及諸州鎮不問遠近竝蠲課役若
克平舊土反我侵地皆許還鄉一無拘限州郡縣長明

加甄別良田廢村隨便安處若輒有課計即以擾民論

又詔

民惟邦本著在典謨治國愛民抑又通訓朕聽朝晏罷
日仄劬勞方流惠澤覃被億兆有梁之季政刑廢缺條
綱弛紊僭盜薦興役賦征徭尤為煩刻大陳御寓拯茲
餘弊滅虐勘黎弗遑創改年代彌流將及成俗如弗解
張物無與厝夕惕疚懷有同首疚思從卑菲約已濟民
雖府帑未充君孰與足便可刪革去其泰甚冀永為定

准令簡而易從自今維作田值水旱未收即列在所言
上折除軍士年登六十悉許放還巧手於役死亡及與
老疾不勞訂補其籍有巧隱并王公百司輒受民為程
蔭解還本屬開恩聽首在職治事之身須通相檢示有
失不推當局任罪令長代換具條解舍戶數村度後人
戶有增進即加擢賞若致減散依事准結有能墾起荒
田不問頃畝少多依舊蠲稅

班兵制十三科詔

太建四年

國之大事受賑興戎師出以律稟策於廟所以又安九
有克成七德自頃掃滌羣穢廓清諸夏乃貔貅之戮力
亦帷幄之運籌雖左衽已戡干戈載戢呼韓來謁亭鄣
無警但不教民戰是謂棄之仁必有勇無忘武備礪溪
之傳韜訣穀城之授神符文叔懸制戎規孟德頗言兵
略朕既慙暗合良皆披覽兼昔經督戎備嘗行陣齊以
七步肅之二鼓得自胷襟指掌可述今竝條制凡十三
科宜即班宣以為永准

求言舉才詔

太建四年

舉善從諫在上之明規進賢謁言為臣之令範朕以寡德嗣守寶圖雖世襲隆平治非寧一辨方分職旰食早衣傍闕爭臣下無貢士何其闕爾鮮能抗直豈余獨運匪薦讜言置鼓公車罕論得失施石象魏莫陳可否朱雲折檻良所不逢禽息觸楹又為難值至如衣褐以見擔簦以遊或者父絕倫或妙年異等干時而不偶左右莫之譽黑貂裘敝黃金且殫終身滯淹可為太息又貴

為百辟賤有十品工拙竝驚勸沮莫分街謠徒擁廷議
斯闕實朕之弗明而時無獻替永言至治何廼爽歟外
可通示文武凡厥在位風化乖殊朝政紕蠹正色直辭
有犯無隱兼各舉所知隨才明試其蒞政廉穢在職能
否分別矢言俟茲黜陟

寬復姑孰封畿詔

姑熟饒曠荆河斯擬博望關畿天限嚴峻龍山南指牛
渚北臨對熊繹之餘城邇全琮之故壘良疇美柘畦畎

相望連宇高甍阡陌如繡自梁末兵災凋殘略盡比雖
務優寬猶未克復咫尺封畿宜須殷阜且衆將部下多
寄上下軍民雜俗極為蠹耗自今有罷任之徒許分留
部下其已住江外亦令迎還悉在南州津裏安置有無
交貨不責市估菜荒墾闢亦停租稅臺遣鎮監一人共
刺史津主分明檢押給地賦田各立頓舍

創築東宮詔

太建四年

梁氏之季兵火薦臻承華焚蕩頓無遺構寶命惟新迄

將二紀頻事戎旅未遑修繕今工役差閒椽楹有擬來
歲開肇創築東宮可權置起部尚書將作大匠用主監
作

還熊曇朗等首級詔

太建五年

古者反噬叛逆盡族誅夷所以藏其首級誠之後世比
者所戮止在一身子嗣或存梟縣自足不容久歸武庫
長比月支惻隱之懷有仁不忍維熊曇朗留異陳寶應
周迪鄧緒等及今者王琳首竝還親屬以弘廣宥

曲赦江右淮北諸州詔

太建六年

王者以四海為家萬姓為子一物乖方夕惕猶厲六合
未混旰食彌憂朕嗣纂鴻基思弘經畧上符景宿下叶
人謀命將興師大拯淪溺灰琯未周凱捷相繼拓地數
千連城將百蠢彼餘黎毒茲異境江淮年少猶有剽掠
鄉閭無賴摘出陰私將帥軍人罔顧刑典今使苛法蠲
除仁聲載路且肇元告慶邊服來荒始覩皇風宜覃曲
澤可赦江右淮南北南司定霍光建朔合豫北徐仁北兗

青冀南譙南兗十五州郢州之齊安西陽江州之齊昌
新蔡高唐南豫州之歷陽臨江郡士民罪無輕重悉皆
原宥將帥職司軍人犯法自依常科

原除南川等郡逋租詔

太建六年

去歲南川頗言失稔所督田租于今未即豫章等六郡
太建五年田租可申半至秋豫章又逋太建四年檢田
稅亦申至秋南康一郡嶺下接應民間尤弊太建四年
田租未入者可特原除庶修墾無廢歲取方實

慰撫青齊詔

太建六年

戢情懷善有國之令圖拯弊救危聖範之通訓近命師
薄伐義在濟民青齊舊隸膠光部落久患凶戎爭歸有
道棄彼農桑忘其衣食而大軍未接中途止憩胸山黃
郭車營布滿扶老携幼蓬流草跋既喪其本業咸事遊
手饑饉疾疫不免流離可遣大使精加慰撫仍出陽平
倉穀拯其懸罄并充糧種勸課士女隨近耕種石鼈等
屯適意修墾

樂遊苑大會詔

太建八年

元戎凱旋羣師振旅旌功策賞宜有饗宴今月十七日
可幸樂遊苑設絲竹之樂大會文武

原逋租詔

太建九年

朕昧旦求衣日旰方食思弘億兆用臻俾乂而牧守莅
民廉平未洽年常租賦多致逋餘即此務農宜弘寬省
可起太建以來訖八年流移叛戶所帶租調七年八年
叛義丁五年訖八年叛軍丁六年七年逋租田米粟夏

調綿絹絲石麥等五年訖七年逋貨絹皆悉原之

錄淮泗戰功詔

太建十年

懋賞之言明於訓誥挾纊之美著在撫巡近歲薄伐廓
清淮泗摧鋒致果文武畢力櫛風沐雨寒暑亟離念切
在茲無忘終食宜班榮賞用酬厥勞應在軍者可竝賜
爵二級并加賚卹付選即便量處

停減供役詔

太建十年

惟堯葛衣鹿裘則天為大伯禹弊衣菲食夫子曰無間

然故儉德之恭約失者鮮朕君臨宇宙十變年籥盱日
勿休乙夜忘寢跂予思治若濟巨川念茲在茲懍同馭
朽非貪四海之富非念黃屋之尊導仁壽以置羣生寧
勞役以奉諸已但承梁季亂離斯瘼宮室未泰有名亡
處雖輪奐未覩頗事經營去泰去甚猶為勞費加以戎
車屢出千金日損府帑未克民疲征賦百姓不足君孰
與足興言靜念夕惕懷抱垂訓立法良所多慙斲雕為
朴庶幾可慕雉頭之服既焚弋綈之衣方襲損撤之制

前自朕躬草偃風行冀以變俗應御府堂署者所營造禮樂儀服軍器之外其餘悉皆停息掖庭常供王侯妃主諸有俸卹竝各量減

申明刑獄詔

太建十一年

昔軒轅命于風后力牧放勛咨爾稷契朱虎冕旒垂拱化致隆平爰逮漢列五曹周分六職設官理務各有攸司亦幾期刑措卜世彌永並賴羣才用康庶績朕日昃劬勞思弘治要而機事尚擁政道未凝夕惕于懷罔知攸

濟方欲仗茲舟楫委成股肱徵名責實取寧多士自今
應尚書曹府寺內省監司文案悉付局參議分判其軍
國興造徵發選序三獄等事前須詳斷然後啟聞凡諸
辦決務令清又約法守制較若畫一不得前後舛互自
相矛盾致有枉滯紆意舞文糾聽所知靡有攸赦

又詔

舊律以枉法受財為坐雖重直法容賄其制甚輕豈不
長彼貪殘生其舞弊事涉貨財寧不尤切今可改正枉

法受財者科同正盜

太建十一年大赦詔

畫冠弗犯革此澆風孥戮是蹈化於薄俗朕肅膺寶命
迄將一紀思經邦濟治憂國愛民日仄劬勞夜分輟寢
而還淳反朴其道靡階雍熙盛美莫云能致遂乃鞠訊
之牒盈於聽覽春欽之人煩於牢犴周成刑措漢文斷
獄杼軸空勞邈焉既遠加以最爾醜徒軼我彭汴淮汝
氓庶企踵王略治兵並言旅義存拯救飛芻挽粟征賦頗

煩暑雨祈寒寧忘咨怨兼宿度乖舛次舍違方若曰
之誠責歸元首愧心斯積馭朽非懼即建子令月微陽
初動應此嘉辰宜播寬澤可大赦天下

崇儉詔

太建十一年

昔堯舜在上茅屋土階湯禹為君藜杖韋帶至如甲帳珠
絡華櫬壁璫未能雍熙徒聞侈欲朕企仰前聖思求訟
平正道多違澆風又靡至今貴里豪家金鋪玉舄貧居
陋巷晷食牛衣稱物平施何其遼遠燿烽未息役賦兼

勞文吏姦貪妄動科格重以旗亭關市稅斂繁多不廣
都內之錢非供水衡之費逼過商賈營謀私蓄靖懷衆
弊宜事更張弗弘王道安拯民蠹今可宣勅主衣尚方
諸堂署等自非軍國資須不得繕造衆物後宮僚列若
有游長掖庭啟奏即皆量遣太子秘戲非會禮經樂府
倡優不合雅正並可刪改市估津稅軍令國章更須詳
定唯務平允別觀離宮郊間野外非恒饗宴勿復修治
并勅内外文武車馬宅舍皆循儉約勿尚奢華違我嚴

規抑有刑憲所由具為條格標榜宣示令喻朕心焉

太建十二年十一月原丹陽等十郡丁租詔

朕君臨四海日旰勞思弘至治未臻斯道而兵車聚
出軍費尤煩芻漕控引不能徵賦夏中亢旱傷農畿內
為甚民失所資歲取無託此則政刑未理陰陽舛度黎
元阻饑君孰與足靖言興念余責在躬宣布惠澤溥沾
氓庶其丹陽吳興晉陵建興義興東海信義陳留江陵
等十郡并謝署即年田稅祿秩並各原半其丁租半申至

來歲秋登

吳明徹拜豫州刺史增封詔

明徹督諸軍北伐進逼壽春齊遣王

琳拒守兵敗追殺琳高宗下詔曰

壽春者古之都會襟帶淮汝控引河洛得之者安是稱
要害使侍中持節都督征討諸軍事征北大將軍開
府儀同三司南平郡開國公明徹雄圖克舉宏略蓋世
在昔屯夷締構皇業乃掩衡岳用清氛沴實吞雲夢即
叙上游今茲蕩定恢我王略風行電掃貔武爭馳月陣

雲梯金湯奪險威陵殊俗惠漸邊氓惟功與能元戎是
屬崇麾廣賦茂典恒宜可都督豫合建光朔北徐六州
諸軍事車騎大將軍豫州刺史增封并前三千五百戶
餘如故

給吳明徹鈇鉞詔

太建八年進
位司空又詔

昔者軍事建旌交鋒作鼓頃日訛替多乖舊章至於行
陣不相甄別今可給司空大都督鈇鉞龍麾

贈周宏正侍中中書監詔

追遠褒德抑有恒規故尚書右僕射領國子祭酒豫州
大中正宏正識宇凝深藝業通備辭林義府國老民宗
道暎庠門望高禮閣卒然殂殞朕用惻然可贈侍中中
書監喪事所須量加資給

皇孫生詔

皇孫初誕國祚方熙思與羣臣共同斯慶内外文武賜
帛各有差為父後者賜爵一級

與邊將書

盧潛范陽涿人北齊世祖初為揚州刺史領行臺尚書在淮南十三年大樹風績為陳人所憚陳主與其邊將書

盧潛猶在壽陽聞其何當還北此虜不死方為國患卿

宜深備之

北齊書 此書北齊書但云陳主不言何帝按潛以武平三年自淮南徵為五兵尚書則

陳宣帝之太建四年也其前八年為文帝今書云聞其何當還北又似其時將徵矣聊屬宣帝

遺詔

太建十四年正月

朕爰自邁疾曾未浹旬醫藥不瘳便屬大漸終始定分夫復奚言但君臨寰宇十有四載誠則雖休勿休日慎

一日知宗廟之負重識王業之艱難而邊鄙多虞生民未乂方欲蕩清四海包吞八荒有志莫從遺恨幽壤皇太子叔寶繼體正嫡年業韶茂纂統洪基社稷有主羣公卿士文武內外俱罄心力同竭股肱送往事居盡忠誠之節當官奉職弘翼亮之功務在叶和無違朕意凡厥終制事從省約金銀之飾不須入塋明器之具皆令用瓦惟使儉而合禮勿得奢而乖度以日易月既有通規公除之制悉依舊制在位百司三日一臨四方州鎮

五等諸侯各守所職並停奔赴

後主

名叔寶字元秀宣帝嫡長子在位七年隋伐陳被執封長城公

與詹事江總書

總見後

陸瑜字幹玉吳郡人少篤學美詞藻為東宮學士兼管記遷太子洗馬中舍人後主時為皇太子欲博覽羣書以子集繁多命瑜抄撰未就而卒太子手令舉哀遣使弔祭與總書

管記陸瑜奄然殂化悲傷悼惜此情何已吾生平愛好卿等所悉自以學涉儒雅不逮古人欽賢慕士是情尤篤梁室亂離天下靡沸書史殘缺禮樂崩淪晚生後學

匪無牆面卓爾出羣斯人而已吾識覽雖局未曾以言
議假人至於片善小才特用嗟賞況復洪識奇士此故
忘言之地論其博綜子史諳究儒墨經耳無遺觸目成
誦一褒一貶一激一揚語玄析理披文摘句未嘗不聞
者心伏聽者解頤會意相得自以為布衣之賞吾監撫
之暇事隙之辰頗用譚笑娛情琴樽間作雅篇豔什迭
互鋒起每清風朗月美景良辰對羣山之參差望巨波
之滉漾或翫新花時觀落葉既聽春鳥又聆秋鴈未嘗

不促膝舉觴連情發藻且代琢磨間以嘲謔俱怡耳目
竝留情致自謂百年為連朝露可傷豈謂玉折蘭摧遽
從短運為悲為恨當復何言遺跡餘文觸目增泣絕絃
投筆恒有酸恨以卿同志聊復叙懷涕之無從言不寫
意

即位詔

太建十四年

上天降禍大行皇帝奄弃萬國攀號擗踊無所迨及朕
以哀榮嗣膺寶歷若涉巨川罔知攸濟方賴羣公用匡

寡薄思播遺德覃被億兆凡厥遐邇咸與惟新可大赦
天下在位文武及孝悌力田為父後者並賜爵一級孤
老鰥寡不能自存者賜穀人五斛帛二疋

勸農詔

太建十四年三月

躬推為勸義顯前經力農見賞事昭往誥斯乃國儲足
資民命攸屬豐儉隆替靡不由之夫入賦自古輸藁惟
舊沃饒貴于十金硤确至於三易腴瘠既異盈縮不同
詐偽日興簿書歲改稻田使者著自西京不實峻刑聞

諸東漢老農懼於祇應俗吏因而侮文輟耒成羣游手
為伍永言妨蠹良可太息今陽和在節膏澤潤下宜展
春耨以望秋坻其有新闢塍畝進糗蒿萊廣袤勿得度
量征租悉皆停免私業久廢咸許占作公田荒縱亦隨
肆勤儉良守教耕淳民載酒有茲督課議以賞擢外可
為格班下稱朕意焉

九品以上各薦一人詔

太建十四年

夫體國經野長世字氓雖因革儻殊弛張或異至於旁

求俊又爰逮側微用道和羹是隆大廈上智中主咸由
此術朕以寡薄嗣膺景祚雖哀疚在躬情慮惓惓而宗
社任重黎庶務殷無由自安拱默敢忘康濟思所以登
顯髦彥式備周行但空勞宵夢屢勤史卜五就莫來八
能不至是用申旦凝慮景夜損懷豈以食玉炊桂無因
自達將懷寶迷邦咸思獨善應內外衆官九品已上可
各薦一人以會彙征之旨且取備實難舉長或易小大
之用明言所施勿得南箕北斗名而非實其有負能仗

金馬而來庭便當隨彼方圓飭之矩矱
氣擯壓當時著賓戲以自憐草客嘲以尉志人生一世
逢遇誠難亦宜去此幽谷翔茲天路趨銅駝以觀國望

求言詔

太建十四年

昔睿后宰民哲王御寓雖德稱汪濊明能普燭猶復紆
已乞言降情訪道高咨岳牧下聽輿臺故能政若神明
事無悔吝朕纂承丕緒思隆大業常懼九重已邃四聰
未廣欲聽昌言不疲痺足若逢廷折無憚批鱗而口柔

之辭僅聞於在位腹誹之意或隱於具僚非所以弘理
至公緝熙帝載者也內外卿士文武衆司若有智周政
術心練治體救民俗之疾苦辯禁網之疏密者各進忠
謹無所隱諱朕將虛已聽受擇善而行庶深鑒物情匡
我王度

省繁費禁左道詔

太建十四年

朕臨御區宇撫育黔黎方欲康濟澆薄蠲省繁費奢僭
乖衷實宜防斷應鏤金銀薄及庶物化生土木人綵花

之屬及布帛幅尺短狹輕疎者竝傷財廢業尤成蠹患
又僧尼道士挾邪左道不依經律民間淫祀祆書諸珍
怪事詳為條制並皆禁絕

發遣淮泗質任詔

太建十四年

中歲克定淮泗爰涉青徐彼土酋豪竝輸罄誠欸分遣
親戚以為質任今舊土淪陷復成異域南北阻遠未得
會同念其分乖殊有愛戀異地中原斯民一也何獨譏
禁使彼離析外可即檢任子館及東館并帶保任在外

者並賜衣糧頒之酒食遂其鄉路所之阻遠便發遣船
仗衛送必令安達若已預仕宦及別有事義不欲去者
亦隨其意

改元至德詔

至德元年

朕以寡薄嗣守鴻基哀惻切慮疹恙纏織訓俗少方臨
下靡筭懼甚踐冰慄同馭朽而四氣易流三光遘至纓
紱列陛玉帛充庭具物匪新節序疑舊緬想前德永慕
昔辰對軒闥而哽心顧宸筵而慄氣思所以仰遵遺構

俯勵薄躬陶鑄九流休息百姓用弘寬簡取叶陽和可
大赦天下改太建十五年為至德元年

原除太建十四年租調詔

至德二年

耕鑿自足乃曰淳風貢賦之興其來尚矣蓋由庾丞務
不獲已而行焉但法令滋章姦盜多有俗尚澆詐政鮮
惟良朕日旰夜分矜一物之失所泣辜罪已愧三千之
未措望訂初下使疆隲兼出如聞貧富均起單弱重弊
斯豈振窮扇暍之意歟是乃下吏苛歛之計也故曰百姓

不足君孰與足自太建十四年望訂租調逋未入者並
悉原除在事百僚辯斷庶務必去取平允無得便公害
民為已聲績妨紊政道

修孔子廟祀詔

至德三年

宣尼誕膺上哲體資至聖祖述憲章之典並天地而合
德樂正雅頌之典與日月而偕明垂後昆之訓範開生
民之耳目梁季湮微靈寢忘處鞠為茂草三十餘年敬
仰如在永惟愍息今雅道雍熙由庚得所斷琴故履零

落不追閱筭開書無因循復外可詳之禮典改築舊廟
蕙房桂棟咸使惟新芳馨潔燎以時饗奠

王公以下各薦所知詔

至德四年 藝文
作江總撰舉士詔

堯施諫鼓禹拜昌言求之異等久著前徽舉以淹滯復
聞昔典斯乃治道之深規帝王之切務朕以寡昧丕承
鴻緒未明虛己日旰興懷萬幾多紊四聰弗達思聞蹇
諤採其謀計王公以下各薦所知旁詢管庫爰及輿阜
一介有能片言可用朕親加聽覽佇於啟沃

前徽藝文
作前冊佇

於作
佇茲

至德四年十一月大赦詔

惟刑止暴惟德成物三才是資百王不改而世無抵角
時鮮犯鱗渭橋驚馬弗聞庭爭桃林逸牛未見其旨雖
剽悍輕侮理從鉗鈇蠢愚杜默宜肆矜弘政乏良哉明
慙則哲求諸刑措安可得乎是用屬寤寐以軫懷負黼
宸而於邑復茲合璧輪缺連珠緯舛黃鍾獻呂和氣始
萌玄英告中履長在御因時宥過抑乃斯得可大赦天

下

改元禎明大赦詔

栢皇大庭鼓淳和於曩日姬王羸后被澆風於末載刑
書已鑄善化匪融禮義既乖姦宄斯作何其淳朴不反
浮華競扇者歟朕居中御物納隍在睦頻恢天網屢絕
三邊元元黔庶終罹五辟蓋乃康哉寡薄抑焉法令滋
章是用當宁弗怡矜此向隅之意今三元具序萬國朝
辰靈芝獻於始陽膏露凝於聿歲從春施令仰乾布德

思與九有惟新七政可大赦天下改至德五年為禎明元年

大政殿訊獄詔

禎明二年

夫議獄緩刑皇王之所垂範勝殘去殺仁人之所用心
自畫冠既息刻吏斯起法令滋章手足無措朕君臨區
宇屬當澆末輕重之典在政未康小大之情興言多愧
眷茲狴犴有軫哀矜可克日於大政殿訊獄

追封吳明徹詔

周滅齊高宗將事徐方遣明徹
北伐兵敗清口就執以憂憤遘

疾卒于長安後主
至德元年詔封

李陵矢竭不免請降于禁水漲猶且生獲固知用兵上
術世罕其人故侍中司空南平郡公明徹爰初躡足迄
屈元戎百戰百勝之奇決機決死之勇斯亦侔於古焉
及招定淮肥長驅彭汴覆勅寇如舉毛掃銳師同沃雪
風威懾於異俗功效著於同文方欲息駕陰山解鞍瀚
海既而師出已老數亦終奇不就結纓之功無辭入褚
之屈望封峭之為易冀平翟之非難雖志在屈伸而奄

中霜露埋恨絕域甚可嗟傷斯事已往累逢肆赦凡厥
罪戾皆蒙灑濯獨此孤魂未霑寬惠遂使爵土湮沒饗
醑無主棄瑕錄用宜在茲辰可追封邵陵縣開國侯食
邑一千戶以其息惠覺為嗣

程文季降封詔

文季忠壯公靈洗子隨吳明徹
北討敗績為周所因逃歸被害

至德元年追贈散
騎常侍又詔曰

故散騎常侍前重安縣開國公文季纂承門緒克荷家
聲早歲出軍雖非元帥啟行為最致果有聞而覆喪車

徒允從黜削但靈洗之立功扞禦久而見思文季之埋
魂異域有足可憫言念勞舊傷茲廢絕宜存廟食無使
餒而可降封重安縣侯邑一千戶以子饗襲封

贈徐陵特進詔

慎終有典抑乃舊章今德可甄諒宜追遠侍中安右將
軍左光祿大夫太子少傅南徐州大中正建昌縣開國
侯陵弱齡學尚登朝秀穎業高名輩文曰詞宗朕近歲
承華特相引狎雖多卧疾方期克壯奄然殞逝震悼于

懷可贈鎮右將軍特進其侍中左光祿鼓吹侯如故并
出舉哀喪事所須量加資給

贈司馬申侍中進侯爵詔

慎終追遠欽若舊則闔棺定諡抑乃前典故散騎常侍
右衛將軍丈始縣開國伯申忠肅在公清正立已治繁
處約投軀殉義朕任寄情深方康庶績奄然化往傷惻
于懷可贈侍中護軍將軍進爵為侯增邑為五百戶諡
曰中給朝服一具衣一襲剋日舉哀喪事所須隨由資

給

制荅尚書八座奏始興王叔陵

叔陵高宗第二子為湘州刺史

淫虐不道高宗不豫入侍疾及崩喪次以剡藥刀斫後主又斫太后數下因突走蕭摩訶

馬客等追斬之奏聞制從

凶逆梟獍反噬宮闈賴宗廟之靈時從釋滅撫情語事
酸憤兼懷朝議有章宜從所奏也

尚書八座奏始興王叔陵

逆賊故侍中中軍大將軍始興王叔陵幼而狼戾長肆

貪虐出撫湘南及鎮九水兩藩吐庶掃地無遺蜂目狼
聲狎近輕薄不孝不仁阻兵安忍無禮無義唯戮是聞
及居偏憂姪樂自恣產子就館日月相接晝伏夜遊恒
習姦詭抄掠居民歷發丘墓謝太傅晉朝佐命草創江
左斲棺露骸事驚聽視自大行皇帝寢疾翌日未瘳叔
陵以貴介之地參侍醫藥外無戚容內懷逆弒大漸之
後聖躬號擗遂因匍匐手犯乘輿皇太后奉臨又加鋒
刃窮凶極逆曠古未儔賴長沙王叔堅誠孝懇至英果

奮發手加挫拉身蔽聖躬叔陵仍奔東城招集兇黨餘
毒方熾自害妻孥雖應時梟懸猶未攄憤怨臣等參議
請依宋代故事流尸中江汙瀦其室并毀其所生彭氏
墳廟還謝氏之塋

葬新安王伯固詔

伯固宣帝第五子與始興王叔陵情好大叶遂謀不軌叔

陵於喪次傷後主出奔東府伯固單馬馳赴為臺兵所殺

伯固同茲悖逆殞身塗路今依外議意猶弗忍可特許
以庶人禮葬

又詔

伯固隨同巨逆自絕于天俾無遺育抑有恒典但童孺靡識兼預葭莩置之旬人良以惻憫及伯固所生王氏可竝特宥為庶人

江揔授尚書令策

於戲夫文昌政本司會治經韋彪謂之樞機李固方之斗極況其五曹斯綜百揆是諧同冢宰之司專臺閣之任惟爾道業標峻寓量弘深勝範清規風流以為準的

辭宗學府衣冠以為領袖故能師長六官具瞻允塞明
府八座儀刑載遠其端朝握揆朕所望焉往欽哉懋建
爾徽猷亮來我邦國可不慎歟

手勅姚察

察累居憂服兼齋素日久因加氣疾柴瘠過甚遣使宣旨重加慰喻令從晚食手勅曰

卿羸瘠如此齋非累年不宜一飯有乖將攝若從所示
甚為佳也

勅答尚書令江總等

吏部尚書蔡徵移中書令後主力擇其人摠等咸共薦察勅答之乃伸筆草詔讀以示察

姚察非惟學藝優博亦是操行清修典選難才今得之

矣

勅報謝貞

貞見後

貞為南平王友掌記室事以母憂去職頃之勅起還府貞累啟固辭勅報之貞竟以毀卒

省啟具懷雖知哀榮在疚而官俟得才禮有權奪可使

力疾還府也

並陳書

答隋書

高宗殂隋主遣使赴弔書稱姓名頓首後
主答之益驕書末云隋主不悅遂謀取陳

想彼統內如宜此宇宙清泰

資治通鑑

題孫瑒誌銘後四十字

瑒為起部尚書卒多創
立江摠為其誌銘後主

題銘後就
宅鐫之

秋風動竹煙水驚波幾人樵徑何處山阿今時日月宿
昔綺羅天長路遠地久靈多功臣未勒此意如何

侍中司馬申誌銘

後主自製誌
銘其卒章曰

嗟乎天不與善殲我良臣

宣太后

章氏諱要兒吳興烏程人高祖踐阼為皇后至廢帝立尊為太皇太后

廢立令

廢帝光大二年下令黜帝為臨海王立高宗嗣位

中軍儀同鎮北儀同鎮右將軍護軍將軍八座卿士昔
梁運季末海內沸騰天下蒼生殆無遺噍高祖武皇帝
撥亂反正膺圖御錄重懸三象還補二儀世祖文皇帝
克嗣洪基光宣寶業惠養中國綏寧外荒並戰戰兢兢
劬勞締構庶幾鼎運方隆殷夏伯宗昔在儲宮本無令
聞及居崇極遂騁凶淫居處諒闇固不哀戚嬪嬙卅角

就館相仍豈但衣車所納是譏宗正衰經生子得誚右
師七百之祚何憑三千之罪為大且費引金帛令充椒
闔內府中藏軍備國儲未盈菴稔皆已空竭太傅親承
顧託鎮守宮闈遺詔綢繆義深垣屏而櫜塗未御翌日
無淹仍遣劉師知殷不佞等顯言排斥韓子高小豎輕
佻推心委仗陰謀禍亂決起蕭牆元相雖持但除君側
又以余孝頃密通京師便相徵召殃慝之咎凶徒自擒
宗社之靈祚氛是滅於是密詔華皎稱兵上流國祚憂

惶幾移醜類乃至要招遠近叶力巴湘支黨縱橫寇擾
黔歙又別勅歐陽紇等攻逼衡州嶺表紛紜殊淹望
豈止罪浮於昌邑非唯聲醜於太和但賊暨皆亡祇徒
已散日望懲改猶加淹抑而悖禮忘德情性不悛樂禍
思亂昏慝無已張安國輩爾凶狡窮為小盜仍遣使人
蔣裕鈎出上京即置行臺分選凶黨賊咬妻呂春徒為
戮納自奚宮藏諸水卷使其結引親舊規圖戕禍盪主
侯法喜等太傅麾下慣遊府朝啗以深利謀興肘腋適

又湯主孫泰等潛相連結大有交通兵力殊彊指期挺
亂皇家有慶歷數遐長天誘其衷同然開發此諸文迹
今以相示是而可恐誰則不容祖宗基業將懼傾覆豈
可復肅恭禋祀臨御兆民式稽故實宜在流放今可特
降為臨海郡王送還藩邸太傅安成王固天生德齊聖
廣深二后鍾心三靈佇眷自前朝不豫任摠邦家威惠
相宣刑禮兼設指揮嘯咤湘郢廓清闢地開疆荆益風
靡若大戊之承殷歷中都之奉漢家校以功名曾何髣

髯且地彰靈璽天表長彗布新除舊祥禎咸顯文皇知
子之鑒事甚帝堯傳弟之懷久符太伯今可還申曩
志崇立賢君方固宗祧載貞辰象中外宜依舊典奉迎
輿駕未亡人不幸屬此殷憂不有崇替容危社稷何以
拜祠高寢歸祔武園攬筆潛然兼懷悲慶

降始興王伯茂溫麻侯令

伯茂進號中衛將軍
與廢帝遊處是時高

宗輔政物望所歸伯茂甚不平帝既廢黜太
后令降伯茂出居別館路遇盜殞高宗志也

伯茂輕薄爰自弱齡辜負嚴訓彌肆凶狡常以次居介

弟宜秉國權不涯年德逾逞狂躁圖為禍亂扇動宮闈
要招麤險觖望臺閣嗣君喪道由此亂階是諸凶德咸
作謀主允宜罄彼司甸刑斯劓人言念皇支尚懷悲憫
可特降為溫麻侯宜加禁止別遣就第不意如此言增
泣歎

巴陵王洸等

上文帝請封衡陽王昌表

洸等率百僚上表詔
可事見文帝優卹

詔初昌之自周還也王琳梗於中流
昌居安陸琳平後天嘉元年濟江

臣聞宗子維城隆周之懋軌封建藩屏有漢之弘規是
以卜世斯永是資刑衛鼎命靈長實賴河楚伏惟陛下
神猷光大聖德欽明道高日月德侔造化往者王業惟
始天步方艱參奉權謨匡合義烈威略外舉神武內定
故以再康禹迹大庇生民者矣及聖武升遐王師遠次
皇嗣曼隔繼業靡歸宗祧危殆綴旒非喻既而傳車言
反公卿定策纂我洪基光昭景運民心有奉園寢克寧
后來其蘇復在茲日物情天意皎然可求王琳逆命逋

誅歲久今者連結犬羊乘流縱轡舟旗野陣綿江蔽陸
兵疲民弊杼軸用空中外騷然藩籬罔固乃旰食當朝
憑流授律蒼兕既馳長蛇自剪廓清四表澄滌八紘雄
圖遐舉仁聲遠暢德化所覃風行草偃故以功深於微
禹道大於惟堯豈直社稷用寧斯乃黔黎是賴第六皇
弟昌近以妙年出質提契冠手偏隔關徼旋踵末由陞
下天倫之愛既深克讓之懷常切伏以大德無私至公
有在豈得狗匹夫之恒情忘王業之大計憲章故實式

遵典禮欽若姬漢建樹賢戚湘中地維形勝控帶川阜
扞城之寄匪親勿居宜啟服衡疑兼崇徽飾臣等參議
以昌為使持節散騎常侍都督湘州諸軍事驃騎將軍
湘州牧封衡陽郡王邑五千戶加給阜綸三望車後部
鼓吹一部班劔二十人啟可奏行

始興王叔陵

字子嵩宣帝第二子以謀逆誅

與何之元書

之元廬江潛人

之元為王琳司空府諮議參軍琳立蕭莊署
之元為中書侍郎遣使齊還至壽春而琳敗

齊主以為揚州別駕及陳軍北伐得淮南地
叔陵為湘州刺史齋書召之元始與陳朝

有隙讀書至云云遂至湘州再遷中
衛府諮議參軍禎明中卒于晉陵

孔璋無罪左車見用

南史

晉熙王叔文

字子才宣帝第十二子為湘州刺史降隋授開府宜州刺史

致隋秦王書

秦王俊見後

隋軍濟江破臺城秦王至漢口叔文自
湘州刺史還朝至巴州乃致書請降

竊以天無二日晦明之序不差土無二王尊卑之位乃
別今車書混一丈軌大同敢披丹款申其屈膝

上隋文帝表

文帝雖嫌其不忠方欲
輯柔江表乃授開府

昔在巴州已先送款乞知此情望異常例



陳文紀卷二